

ERINDISBRÉF

fyrir trúnaðarmenn við framkvæmd samræmdra lokaprófa í grunnskóla.

Í starfi sínu til eftirlits við framkvæmd samræmdra lokaprófa í 10. bekk grunnskóla er trúnaðarmanni skylt að fara að eftirfarandi reglum:

1. gr.

Trúnaðarmaður er fulltrúi menntamálaráðuneytisins á prófstað og hefur eftirlit með því að próf fari fram samkvæmt þeim reglum sem settar eru um framkvæmd þeirra.

2. gr.

Trúnaðarmaður skal mæta á prófstað einni klukkustund áður en próf á að hefjast og vera á prófstað á meðan próf fer fram. Honum ber að kanna í viðurvist skólustjóra eða staðgengils hans hvort umbúðir utan um prófgögn hafi verið rofnar og opna pakka með prófgögnum u.þ.b. hálfri klukkustund áður en próf hefst. Honum ber að ganga úr skugga um að öll gögn séu fyrir hendi og kanna hvort um er að ræða sérstök fyrirmæli varðandi framkvæmd prófsins sem nauðsynlegt er að gera yfirsetumönnum grein fyrir. Reynist í einhverju áfátt með undirbúning og framkvæmd prófsins skal trúnaðarmaður sjá til þess að ráðin verði bót á því.

3. gr.

Tímanlega áður en próf hefst skal trúnaðarmaður í samráði við skólustjóra ganga úr skugga um að niðurröðun nemenda í stofur sé þannig háttáð að nemendur geti ekki lesið úrlausnir annarra, að yfirsetumenn séu hæfilega margir og sinni starfi sínu af árvegni og almennt að aðstæður á prófstað séu samkvæmt reglum. Ætlast er til að kennari sem kennir viðkomandi grein sitji ekki yfir nemendum sínum í prófi.

4. gr.

Áður en próf hefst kynnir trúnaðarmaður sér fyrirmæli og leiðbeiningar frá Rannsóknastofnun uppeldis- og menntamála um framkvæmd þess, sem fylgja prófgögnum. Komi upp vafamál ber trúnaðarmanni að skera úr í samráði við skólustjóra eða hafa samband við Rannsóknastofnun uppeldis- og menntamála í síma 551-0560.

5. gr.

Hafi einstökum nemendum verið veitt heimild til að víkja frá reglum um fyrirlögn prófs, ber trúnaðarmanni að kynna sér bréf sem staðfesta heimild til frávika og ganga úr skugga um að skilyrði, sem Rannsóknastofnun uppeldis- og menntamála kann að hafa sett, séu haldin.

6. gr.

Trúnaðarmaður skal sjá um að próf hefjist og ljúki á tilsettum tíma. Miðað skal við að allir nemendur séu sestir og geti hafist handa án truflunar á þeim tíma sem próf á að hefjast. Á tilsettum tíma eiga allir nemendur að hafa skilað úrlausnum sínum.

7. gr.

Trúnaðarmaður fylgist með því í samráði við skólustjóra að allir nemendur mæti til prófs. Komi nemandi ekki til prófs, lítur trúnaðarmaður eftir því að skýring sé skráð á nafnlista sem fylgja skal prófúrlausnum hverrar bekkjardeildar.

8. gr.

Trúnaðarmaður lítur eftir því að nemendur fái enga hjálp við að leysa verkefni í prófi eða vísbendingar um rétt svör.

9. gr.

Í samráði við hlutaðeigandi skólastjóra úrskurðar trúnaðarmaður um sérstök tilvik sem kunna að koma upp varðandi prófið eða framkvæmd þess. Telji trúnaðarmaður eða skólastjóri það nauðsynlegt, skal hafa samband við Rannsóknastofnun uppeldis- og menntamála um lausn vandamálsins.

10. gr.

Í sérstökum tilvikum geta nemendur þurft að hætta próftöku eftir að próf er hafið t.d. vegna veikinda. Aðrar ástæður geta einnig talist gildar til að nemandi hætti próftöku. Trúnaðarmaður og skólastjóri meta hvort ástæða er gild eða ekki. Trúnaðarmaður sér til þess að prófhefti nemanda sem verður að hætta próftöku, séu sérstaklega merkt, ástæða skráð og fylgi prófheftum viðkomandi nemanda.

11. gr.

Þegar gengið er frá úrlausnum að prófi loknu, sér trúnaðarmaður til þess að þeim sé raðað í samræmi við nafnalista nemenda, hvert hefti fyrir sig í sérstökum bunka.

12. gr.

Trúnaðarmaður sér um að koma prófúrlausnum til Rannsóknastofnunar uppeldis- og menntamála strax að loknu prófi, með ábyrgðarpósti eða á annan tryggilegan hátt.

13. gr.

Erindisbréf þetta er sett samkvæmt ákvæðum reglugerðar nr. 516/1996 um fyrirkomulag og framkvæmd samræmdra prófa í grunnskólum, sbr. 46. gr. grunnskólalaga nr. 66/1995, og öðlast þegar gildi.

Menntamálaráðuneytinu, 26. mars 1997.

Björn Bjarnason.

Guðríður Sigurðardóttir.

REGLUGERÐ

um breytingu á reglugerð nr. 433/1995 um viðvörunarmerkingar á tóbaki.

1. gr.

2. mgr. 2. gr. hljóðar svo:

Viðvörunin skal vera skýr og læsileg, feitletruð, prentuð á bakgrunn sem sker sig frá og á þann hátt að ekki sé hætta á að hún skemmist þegar umbúðirnar eru opnaðar og ekki vera prentuð á gagnsæjar umbúðir eða aðrar ytri umbúðir. Stærð viðvarana skal vera skv. 3. mgr. 3. gr. á umbúðum vindlinga en 2. mgr. 4., 5. og 6. gr. á öðrum tóbaksumbúðum, sbr. 7. gr. um myndmerkingar.

2. gr.

Reglugerð þessi, sem sett er með stoð í 6. gr. laga um tóbaksvarnir, nr. 74/1984, sbr. lög nr. 101/1996, tekur þegar gildi.

Heilbrigðis- og tryggingamálaráðuneytinu, 25. mars 1997.

Ingibjörg Pálmadóttir.

Sólveig Guðmundsdóttir.